

Ajri Ro Ewōr Aer Nañinmej in TB (Tuberculosis)

Emōj kakilen im loe bwe ewōr an ajri eo neĵūm nañinmej in TB. Meĵeĵein bwe kij in TB eo ej eddekļok ilo ānbwinnin ajri eo neĵūm.

Ajri eo neĵūm ear bōk TB ia?

Ajri ro ewōr aer nañinmej in TB raar bōk nañinmej eo jān bar-juon armej ewōr an nañinmej in TB. Eaorōk bwe jen jeļa ia eo ajri eo neĵūm ear bōk TB jene ilo iien eo eṃōkajtata im kadedeik jermal in etale wōn ekar pād turin/añūri im bōbrae jān an ajeededļok nañinmej eo ñan ro jet. Nōōj eo an public health enaaj kowaļok wōn iaan ro ekar pād turin/añūri eaikuj jermal in etale kōn TB.

Kien ko an State rej kōmlōt bwe aolep case in TB rej aikuj repoot ñan jikin loloodjake ājmour an State eo. County health department eo ej aikuj loloodjake bōbrae jān an ajeeded nañinmej in TB.

Aorōk:

Elaññe ajri eo neĵūm ejjab ļoor karōk ko ñan idaa wūno, kij ko remaroñ etaļ in jab tōmak wūno ko im jalirara kōṃadṃōd ak jab ājmourļok. Eñin unin ad waje idaa wūno im appointment ko.

Kōjjeļāik nōōj eo an public health elañe ajri eo neĵūm ej bar idaa wūno ko jet kōn wāween an wūno jelōte (side effects) im wāween an wūno ko jermal ippān doon. Lale pepa in kōmmeļeļe ko an wūno eo ñan meļeļe ko reļapļok ikijien wāween an wūno ko jermal ippān doon im wāween an wūno jelōte juon armej (side effects).

Jermal in Waje Kaidaake Wūno (Directly Observed Therapy ak DOT):

Ñan ajri ro ewōr aer TB, rijermal eo an county health department enaaj waje an jinen/jemān ajri ro kaidaake er wūnokaan TB ko, etan jermal in DOT. Emōj mālejoñe im loe bwe jermal in waje kaidaake wūno (DOT) ej jipañ ri-nañinmej ro būki im kōmaati wūno ko ilo eĵeļok ruṃwij ak apañ.

Kwōaikuj iioon rijermal eo ej waje idaa wūno (DOT), ijo im iien eo kar errā kake. Kwōaikuj karejar im kijenmej jermal ippān health department eo eaikuj loloodjake ajri eo neĵūm bween mour jān TB.

Ñan kaidaake wūno ko:

Elaññe ajri eo neĵūm ejjab maroñ kōdālōb/oraņļok batin likiio:

- Kattipdikdiki batin ko ak kōpeļļoke wūno ko ewōr kobbaer (capsules).
- Kobaikļok wūno tipdikdik/kobban ñan men etōñal im pidodo āinwōt, jōkleej pudding, applesauce, ṃōñā kijen niñniñ, jaam ak jabdewōt men eo enno ippān ajri eo neĵūm.
- Kaidaake aolepān wūno eo ilo juon wōt iien im ilo eĵa iien eo wōt ilo kajojo raan.

Pojak ñan Bar jāāk: Kōm naaj aikuj jāake waj wōt ajri eo neĵūm, mae iien emour jān nañinmej eo. Meļeļein, kōmij aikuj loe ajri eo neĵūm kajojo allōñ ilo health department eo ñan etale an pād.